



Kattusseqatigiit Partiiat

17. august 2012

UKA 2012/42

Inatsisartut Suleriaasianni § 33 naapertorlugu Inatsisartut aalajangiiffigisassaattut siunnersuut imaattoq saqqummiuppara:

Kalaallit nunaanni suliffeqarfinnut uuliasiornermi aatsitassarsiornermilu ingerlatsinermi teknikkikkut piunasaqaataasut anguneqarsinnaaqullugit nunaqavissut suliffeqarfiutaasa piginnaasaat periarfissaallu pitsanngorsarniarlugit qanoq suliniuteqartoqarsinnaanersoq Naalakkersuisut misissuititsinermik peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Knud Fleischer, Kattusseqatigiit Partiiat).

Tunngavilersuut:

Naluneqanngitsutut aatsitassanut ikummatissanullu inatsimmi § 18, *imm.* 2 ima oqaasertaqarpoq:

” Piginnaatitsissummik pigisaqartup § 16 malillugu misissuinissamut piiaanissamullu akuersissummik tunineqarsimasup suliassanik isumaqatigiissuteqarnerni, pilersuinerni kiisalu kiffartuutunik sullinneqarnerni suliffeqarfiit Kalaallit Nunaanneersut atussavai. Suliffeqarfiilli allat atorveqarsinnaapput, Kalaallit Nunaanni suliffeqarfiit teknikkikkut niueqatigiinnikkulluunniit unammillersinnaassuseqanngippata.”

Aatsitassanut ikummatissanullu inatsimmi nunaqavissut suliffeqarfiutaat salliutinneqarmata nuannaarutissaavoq, taamaattorli aamma nammineerluta suliffeqarfiutigit teknikkikkut niueqatigiinnikkullu naapertuuttumik unammillersinnaassuseqanngippata suliffeqarfinnik avataaneersunik sulisoqarsinnaaneq aamma inatsimmi periarfissaatinneqarpoq.

Kattusseqatigiit Partiiat-niit isumaqarpugut erseqqissarneqartariaqartoq qanoq iliornikkut nunaqavissut siunissami aatsitassarsiorturnik suleqateqarsinnaanerannut periarfissaasa pitsanngorsarneqarnissaat, nunatsinnut aningaasaqarnermullu iluaqutaasussaammat.

Kattusseqatigiit Partiiat-ni isumaqarpugut siunissaq qaninneq ungasinnerusorlu isigalugit iluarsaaqqinnerit pisariaqarput, inuiaqatigiinnut nutanngoriartuinnartunut aamma nunarsuarmioqatitsinnut unammillersinnaaneq, suli pitsaanerusumik angusaqarfiusumillu suleqatiginninnerusinnaaneq aamma anguniarlugu.

Nunatsinni suliffissaqarnikkut inerisaajuarnissaq pisariaqartuaannartussaavoq minnerunngitsumik aamma aatsitassarsiorneq allanillu nunatta pisussutaanik uumaatsunik atorluanaanerulernissarput anguniarlugu.

Kattusseqatigiit Partiianniit soqutigiuaannarparput nunatta pisuussutaasa uumaatsut nunatsinnut aningaasatigit annertunerpaamik pissarsissutingineqartarnissaat.

Taamaattumik ingerlatseqatigiiffeqqanik nuna minerals-itut ittunik aamma kalaallit kikkulluunniit piginneqataaffigisinnaasaannik pilersitsiorturnissaq aamma politikkkut pitsaanerusumik aqutissiuunneqartariaqartoq **Kattusseqatigiit Partiiat**-niit isumaqarpugut.

Isumaqarpugut aatsitassarsiornermi imaluunniit nunatta pisuussutaanik allanik pīaanissamut, piginneqatigiiffeqqat taamaattut nunatsinniit pigineqartut aatsitassarsiornermi imaluunniit pisuussutitta uumaatsut pīarneqarneranni suliffeqarfiit nunatsinneersut annerusumik peqataatinneqartalernerisigut aningaasat amerlanerpaat nunatsinnut tuttarnissaat taamaaliornikkut aamma qulakkeerinniffigineqarsinnaasoq.

Taamaaliornikkut aamma tapiiffigineqaannarnissaq imaluunniit tapeeqataaginnarnissaq kisiat eqqarsaatiginnikkaluarlugu, aningaasat nunatta avataanut anninneqartussaagaluit ilarpassui, nunatta karsianut nakkartalissasut, nunatsinnilu aamma aningaasat kaaviiartinneqartussat amerlisinnaasut Kattusseqatigiit Partiiāniit isumaqarpugut.

Tassa nunatta pisussuutaanik uumaatsunik pīaanissami suliffeqarfissuit avataaneersut kisiisa isumalluutiginagit, aamma suliffeqarfeerannguugaluartunik nunatsiniik piginneqataaffigineqartunik aatsitassarsiornermi nunallu pisuussutaanik uumaatsunik pīaanermi kalaallit tamakkiinerusumik akuutinneqarnissarput Kattusseqatigiit Partiiāniit assorujussuaq pingaartipparput anguniarlugulu.

Isumaqarpugut aamma taamaaliornikkut siunissamut piareersaaqataaneq aamma aningaasaqarnikkut pitsaanerpaamik nunatsinnut qulakkeerinnissinnaaneq anguneqqarsinnaasoq. Taamaaliornikkut sulisussat nunaqavissut amerlanerpaat qulakkeerinniffigineqassammata.

Aamma taamaaliornikkut kikkut tamarmik pitsaanerusumik nunatsinnullu iluanaarutaanerpaamik qulakkeerinniffigineqarnissaat angusinnaavarput, Kattusseqatigiit Partiiāni inuutissarsiutunik uagut kalaallit nammineerluta annerusumik peqataanerulernissattinnut Kommunit Namminersornerullutillu oqartussat sulisitsisut aammalu innuttaasut kikkulluunniit soqutiginnittut peqataanissaannut periarfissanik ujartuisariaqartugut.

Sulisartortagut ilinniartitaanerit pikkorisarnerillu aqutigalugit suliffinnik qulakkeerinninnissaat tamatta pisussaaffigaarput, nunatsinni sulisartut tassaasariaqarput tamatigut salliutinneqartussat, taamaattumik avataaniit sulisussanik tikisitsisarnermi piumasaqaatit sukaterneqarnissaannut Kattusseqatigiit Partii-āniit tamakkiisumik peqataanissattinnut piareersimanerput matumani nalunaarutigigaarput.

Siunnersuutip pisortanut allaffissornikkut aningaasaqarnikkullu kingunerisassai:

Misissuisitsinermut atatillugu Namminersorlutik Oqartussat aningaasartuutigisassaat AC-ārsværkip pingajorarterutaa 160.000 kr. missaaniittoq naatsorsuutigineqarsinnaavoq.

Siunnersuutip namminersortunut allaffissornikkut aningaasaqarnikkullu kingunerisassai:

soqanngilaq.

Siunnersuutip innuttaasunut allaffissornikkut aningaasaqarnikkullu kingunerisassai:

Innuttaasunut allaffissornikkut sunniuteqarnissaa naatsorsuutigineqanngilaq, taamaattorli misissuisitsineq nunaqavissut suliffeqarfiutaannut ungasinnerusoq isigalugu sinaakutissanik pitsaanerusunik aqutissiussisinnaavoq innuttaasunut aningaasaqarnikkut pitsaasumik sunniuteqarsinnaalluni.